

INUIT ATAQATIGIIT

Inatsisartuni



18. juli 2018

UKA 2018/47

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nappaatit suut napparsimasut sivikitsumik piffissamiluunniit aalajangersimasumik sivilissusiligaanngitsumi Danmarkiliartutik katsorsartikkiartortariaqaleranerannik kinguneqartarnersut pillugit Naalakkersuisut UPA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimasunik Danmarkimut katsorsartikkiartortunik ikilisitsisinnaasut ilanngunneqassapput.

(Inatsisartunut ilaasortaq Aqqaluaq B. Egede, Inuit Ataqatigiit)

Tunngavilersuut:

Inuit aalajangersimasumik aamma immikkuullarilluinnartumik nappaatillit nunatsinni peqqinnissaqarfiup tungaaniit ikiorserasuarneqarnissaminnik periarfissaalatsisarnerat aaqqiiviginiarlugu Naalakkersuinikkut suliniuteqartoqarnissaa pisariaqalivippoq. Inuppassuit immikkuullarissumik qaqutigoortumillu nappaateqartut peqqinnissaqarfimmi suleriaatsip pitsaasumik sullissinermikkut matussusersinnaasannikkaat tamanit naluneqanngilaq.

Taamaammat siunnersuut una Inatsisartut aalajangiiffigisassaattut siunnersuutitut qaqqippara, isumaqarama nunatsinni peqqissaagasuarneq katsorsaagasuarnerlu inummut ikiortarialimmut pitsaanerpaamik sunniuteqaannarani aamma peqqinnissaqarfiup aningaasartuutissarpassuarnik sipaarfigisinnaagaa. Aningaasaliissutit kisiisa pinngikkaluarlugit aamma inuit peqqissartut katsorsartittullu peqqinnissaqarfiup tungaaniit inuttut naleqartutut pineqarnissaminnik ugartuisarnerannut aalajangeeqataalluinnartuusooq isumaqarpunga.

Nunatsinni peqqinnissaqarfiup atugassarititai sapinngisamik innuttaasunut tamanut atoruminartuunissaat anguniartuariaqarparput. Nunatsinni inuuniarnikkut atukkat nunatsinni najugaqarumassutsimut aalajangeeqataasuupput, aamma peqqissutsikkut illersorneqarsinnaasumik inuuffeqarnissamut aalajangeeqataalluinnarput.

Nutaarsiassaannigilaq nunatsinni peqqinnissaqarfiup atugassarititaasa pitsaassutsimikkut killeqarpallaarnerat tunngavigalugu nunatsinni najugaqarsinnaajunnaarlutik nunatta avataanut nuuginartartut amerlasoorujussuusut oqaatigineqartarmat. Tamanna nunap innuttaqassutsimigut amerlisarusuttut naliginnaasutut isiginagu immikkorluinnaq suliassatut pingaarutilittut tigusariaqarpaa. Tamattami nunatsinni atukkavut akisussaaqataaffigaaqut.

Nunatta inuttusiartornissaa, aamma inuuffigiunartuunissaa anguniarutsigu peqqinnissaqarfik inuup pineqartup nalilersuineranut qitiulluinnartarmat tupinnartuunngilaq. Imaappoq, Inatsisartunut Naalakkersuisunulluunniit ilaasortaagutta iliusissatsinnik ataatsimoorussassatsinnik anguniagassatsinnillu pingaarutilerujussuarnik amigaateqarpugut. Qinikkat qanoq ililluta ajornartorsiutip aaqqinnissaanut ikiuussinnaavugut? Qanoq pitsanngorsaaniissamut sinaakktissat nutartereqataaffiginnavaagut? Apeqqutit taamaattut pingaarutillit akissutissarsisariaqarpagut. Pineqartormi tassaavoq nunatsinni inuit immikkuullarissumik nappaatillit aamma maani nunatsinni inuttut naleqartinneqartut pineqarlutik peqqinnissaqarfimmiit ikiorasuarneqartarnissaasa pitsanngortinnissaa.

Siunnersuummi uani nappaatit nunatsinni katsorsarneqarsinnaalereersimasut suunersut paaserusupparput, peqatigisaanillu napparsimasut qanoq amerlatigisut angerlarsimaffitsik ulluinnarnilu inuunertik qimallugu Danmarkimut sivikitsumik piffissamiluunniit sivirususilerneqanngitsumi katsorsartikkiartortarnersut nassuiartikkusupparput. Nappaatit suut, tassani qaqutigoortuunerat apeqqutaatinnagu, siunissami nunatsinni katsorsarneqarsinnaalernissamut perarfissaqarnersut misissorneqarnissaat siunertaavoq. Tamanna Peqqinnissaqarfitta naammassinnissinnaassusianut kiisalu politikerit aningaasanik pingaarnersiui nerannut tungassuteqarpoq.

Nappaatit aalajangersimasut taakku siaruaassimanninnerat pissutigalugu aningaasatigut naammassinnissinnaassutsimullu atatillugu pingaannginnerusut nalilerneqarlutik katsorsarneqartanninnissaa pingitsoortinnissaa pingaaruteqarpoq.

Pisumi ilungersunartumi Inatsisiliortut Naalakkersuisullu akisussaaffimmik tiguseqataanissaat, taamatullu suleriaatsitsinnut naapertuuttumik ajornartorsiummi qaangiiniarnermi suleqataanissatsinnut periusissamik ataatsimoorluta pigisassatsinnik suliaqartoqarnissaa assut angorusuppara. Neriullunga siunnersuut Inatsisartuniit partiiniillu tamanit tigulluarneqassasoq. Suleqatigiilluta ilisimasassanik nutaanik anguniagassanillu nutaanik siunnerfeqaqatigiilerniarta aamma peqqinnissaqarfik pillugu nunatsinni inuttut ulluinnarni inuuniarnikkut atukkavut eqqarsaatigalugit.

Taamatut siunnersuuteqarlunga neriutigaara siunnersuut ilalersorneqarluni Inatsisartut Peqqissutsimut Ataatsiniititaliaannut ingerlatinneqassasoq. Taamalillunga siunnersuut Inatsisartunut suliaannngortippara.

Pisortanut aningaasatigut allaffissornikkullu kingunerisassai:

Suleqatigiisitamik pilersitsiniarnerup aallartisarnera naatsorsuutigineqassaaq allaffissornikkut pilersaarusiornullu qanorlu inuttalersugaanissaanut suliaqartoqarnermi ukiup affaanik sivirususeqassasoq. Tassalu AC Fuldmægtigep ataatsip sulinera 250.000 koruuninik naleqassalluni.

Namminersortunut aningaasatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.